



LEMBAGA PERTUBUHAN PELADANG
FARMERS' ORGANIZATION AUTHORITY
KEMENTERIAN PERTANIAN DAN INDUSTRI MAKANAN
MINISTRY OF AGRICULTURE AND FOOD INDUSTRIES

Menara LPP
No. 20, Jalan Sultan Salahuddin
50480 KUALA LUMPUR
MALAYSIA
Atau Karung Berkunci 11005, 50990 KUALA LUMPUR

Tel : 603-2610 9600
Faks : 603-2697 0987
Portal Rasmi : <http://www.lpp.gov.my>
E-mel : info@lpp.gov.my



SIARAN MEDIA

LAWATAN KERJA YB DATUK SERI DR RONALD KIANDEE MENTERI PERTANIAN DAN INDUSTRI MAKANAN KE PERTUBUHAN PELADANG KAWASAN BERNAM JAYA

SABAK BERNAM (12 JUN) -- Menteri Pertanian dan Industri Makanan (MAFI) YB Datuk Seri Dr Ronald Kiandee, hari ini mengadakan lawatan kerja ke Pertubuhan Peladang Kawasan (PPK) Bernam Jaya, Sabak Bernam Selangor.

Lawatan kerja ini bertujuan antara lain untuk beliau meninjau kelangsungan rantaian bekalan makanan di lapangan ketika tempoh penutupan penuh sektor ekonomi dan sosial ataupun Perintah Kawalan Pergerakan (PKP) 3.0 yang bermula 1 Jun 2021 hingga 14 Jun 2021 dan telah dilanjutkan hingga 28 Jun 2021.

Lawatan YB Menteri MAFI pada kali ini juga bertujuan bagi melihat aktiviti sektor ruminan di peringkat ladang susulan penularan penyakit *Lumpy Skin Disease* (LSD) yang dilaporkan menjangkiti ternakan lembu/kerbau.

Untuk makluman, MAFI melalui Jabatan Perkhidmatan Veterinar (DVS) telah mengambil tindakan segera mengaktifkan surveyan menerusi DVS Negeri serta Jabatan Perkhidmatan Kuarantin dan Pemeriksaan (MAQIS) untuk menjalankan pemeriksaan ke atas ternakan di ladang-ladang dan premis kuarantin.

Langkah ini adalah bagi mengesan sekiranya terdapat ternakan yang menunjukkan tandatanda klinikal LSD.

Bagi mencegah risiko kemasukan virus LSD menerusi pengimportan ternakan hidup, MAFI melalui DVS juga telah menggantung pengimportan ternakan lembu/kerbau bagi tujuan pembiakan dan penyembelihan dari negara terjangkit seperti Thailand berkuatkuasa pada 7 Jun 2021.

Dr Ronald berkata DVS akan terus mengaktifkan program surveyan di lapangan menerusi pemeriksaan fizikal di semua ladang/kandang ternakan di seluruh negara bagi mengesan ternakan terjangkit.

Menurut beliau, tindakan pengawalan dan pencegahan LSD adalah melalui Prosedur Operasi Standard (SOP) Kawalan Penyakit Berjangkit dan SOP Pengurusan Ternakan di Lapangan.

Pada masa sama, Dr Ronald juga mengingatkan penternak untuk mempertingkatkan amalan perladangan yang baik dari aspek biosekuriti, kebersihan ladang, kawalan makhluk perosak, sumber air bersih dan sumber makanan daripada pengilang yang mempunyai pensijilan *Good Manufacturing Practices* (GMP).

Ronald menjelaskan kawalan, pencegahan, dan pembasmian yang cekap dan bertanggungjawab oleh semua pihak berkepentingan adalah sangat penting bagi memastikan penularan LSD di Malaysia dapat dibendung bagi memastikan pengeluaran ruminan tidak terjejas dan menjamin kelestarian industri ruminan negara.

Tambah beliau lagi, ini juga penting memandangkan Tahap Sara Diri (SSL) daging lembu masih berada pada sekitar 22.3 peratus dan negara masih bergantung kepada import bagi memenuhi keperluan pasaran tempatan.

Dalam pada itu, Di PPK Bernam Jaya, Dr Ronald meninjau industri penternakan menerusi projek ternakan lembu fidlot yang diusahakan oleh usahawan Encik Mohamad Rasfanjani Mashugi di Unit Peladang Kampung Tebuk Jawa, di bawah PPK Bernam Jaya yang berjumlah 250 ekor.

Projek ini bermula pada tahun 2020 dilaksanakan secara usahasama antara Pertubuhan Peladang Negeri Selangor (PPNS), PPK Bernam Jaya dan usahawan Encik Mohamad Rasfanjani.

Pemasaran lembu dilaksanakan oleh PPK Bernam Jaya berjalan lancar setakat ini bagi memenuhi keperluan daging segar di pasaran dan juga untuk keperluan Hari Raya Aidiladha kelak bagi aktiviti korban dan aqiqah.

Dalam lawatan yang sama, YB Menteri MAFI juga telah meninjau projek tanaman fertigasi tembikai wangi (Rock Melon) yang diusahakan oleh usahawan Encik Hafiz Azuddin Ariffin di Unit Peladang Tebuk Jawa di bawah PPK Bernam Jaya.

Projek ini berkeluasan 2.5 ekar dengan berkapasiti 13,000 Polibeg yang telah dimulakan pada tahun 2017 dan hasil tanaman telah dipasarkan melalui PPK Bernam Jaya.

Untuk makluman, PPK Bernam Jaya ditubuhkan pada April 1984 mempunyai ahli seramai 3,761 orang serta mempunyai 29 Unit Peladang dan sebuah koperasi.

Turut hadir semasa lawatan kerja ini adalah Timbalan Menteri II MAFI YB Datuk Che Abdullah Mat Nawi, Ketua Setiausaha MAFI Datuk Haslina Binti Abdul Hamid dan Ketua Pengarah Lembaga Pertubuhan Peladang (LPP) Datuk Azulita Binti Salim.

MAFI mengambil pelbagai pendekatan dan langkah untuk memastikan kelangsungan rantai bekalan makanan sepanjang masa termasuk memastikan kelancaran operasi pengeluaran dan pemasaran di semua PPK di seluruh negara beroperasi mengikut SOP yang telah ditetapkan oleh Majlis Keselamatan Negara (MKN).

Kementerian juga mengusahakan pelbagai insentif pengeluaran kepada golongan sasar untuk meneruskan aktiviti masing-masing dan mengekalkan bekalan makanan.

Sehingga 10 Jun 2021, MAFI melalui Jabatan dan Agensi dibawahnya secara keseluruhan telah mengeluarkan sebanyak 88,034 surat kebenaran keterlibatan dalam sektor pertanian tidak formal (*informal*) termasuk aktiviti rantaian pembekalan dan pemasaran berkaitan keperluan makanan kepada petani, penternak, nelayan, pengusaha kecil B40 serta pengusaha mikro asas tan.

Bagi memastikan kelancaran aktiviti pemasaran hasil pertanian semasa tempoh pelaksanaan PKP, Lembaga Pertubuhan Peladang telah membuka Bilik Gerakan Crisis Management Centre (CMC) yang beroperasi dari 8 pagi hingga 5 petang. Sebarang pertanyaan dan aduan boleh hubungi talian Hotline LPP di 03-2610 9614/ 03-2610 9605 atau e-mel ke info@lpp.gov.my.

#####

Untuk maklumat lanjut sila hubungi:

Bahagian Hal Ehwal Korporat

Lembaga Pertubuhan Peladang (LPP)
No.20, Menara LPP, Jalan Sultan Sallahudin
50480 Kuala Lumpur
No. telefon : 03 – 2610 9614 /9605
No. Faks : 03 - 2697 0961
Email : info@lpp.gov.my

Tarikh: 12 Jun 2021